


AWIG-AWIG DESA PAKRAMAN NANGKA



KECAMATAN BEBANDEM
SEM

MURDA WAKYA

“ Om Swastyastu ”

Om Awignam Astu Namu Sidham

Purwa pangastunkaran titiang Krama Desa Nangka, ring bukpadan Ida Sang Hyang Widi Wasa sangkan paraning dumadi, Bhatara – Bhatari sane malingga ring Pura Puseh Nangka minakadi Pura Khayangan sami sane wenten sajroning wawengkon Desa Nangka, dawning melarapan saking kerte wara nugrahan Paduka Bhatara Samudhaya karya puniki kasidha puput.

Kaping kalih hatur angayubhagyan titiang Krama Desa Nangka, pinghajeng ring ida dane pra Pengelingsir, Keliang, Pemangku, minakadi ida dane sng maraga cestakara widagdha pradnyan wicaksana sareng sami, sane sampun sangkaning sweca ledang sareng mapawangun ngripta uger – uger merupa awig – awig Desa Pakraman Nangka puniki, pacang kaanggen sepat siku – siku sajroning desa kantos kaungkur wekas.

Taler majeng ring Pamerintah Daerah Kabupaten Karangasem, para manggala sane mastika ngiwang patutang awig – awig, titiang ngaturang pangayu bagya, dwaning sampun kasiddhan nureksa, maritetes saha mastika, kantos merupa puput.

Mungging daging ipun manut Tri Hita Karana, indik Kahyangan genh ngadisthana Ida Sang Hyang Parama Wisesa indik pawongan pinaka karma Desa, Indik palemahan punika wawidangan wewengkon desa, mebantang antuk lekita sastra Agama, sesana, paswara, dresta minakadi sane sawosan, sane hanut ring pemargin Dharma Agama kalih Dharma Negara dumadak kasidhan mamangguhang kajagaddhitan sekala niskala.

Om Santi Santi Santi Om

PRATAMA SARGGAH

ARAN LAN WEWIDANGAN DESA

Pawos 1

1. Desa punika mewasta “Desa Pakraman Nangka” selantur ipun kinucap kalih kasuratang sajroning lekita “Desa Pakraman Nangka”;
2. Kakuwub wawidangannya mewates nyatur :
 - ha. Tepi siring wetan utawi Kangin : DESA ADAT TANAH ARON
 - na. Tepi siring Kulon utwi kauh : DESA ADAT SIBBTAN
 - ca. Tepi siring Lor utawi Kaler : WANJA / ALAS
 - ra. Tepi siring Kidul utawi Kelod : DESA ADAT KOMALA
3. Sajroning wawengkon Desa Pakraman Nangka, wenten babanjaran lwire :
 - ha. Banjar Nangka
 - na. Banjar Butus

DWITYA SARGGAH

PIKUKUH LAN PATITIS TATUJON

Pawos 2

Maka pikukuh Desa Pakraman Nangka, ngerajegang, mikukuhin, kalih metindihin pisan :

1. Pancasila
2. Undang – Undang Dasar 1945
3. Tri Hita Karana

Pawos 3

Desa Pakraman Nangka ngamanggehang patitis tatujon, lwir ipun :

1. Ngutamayang tata cara maagama Hindu;
2. Ngawangunang katreptian sajroning Desa Pakraman, mangda kasidhan rajeg katreptyaning praja;
3. Ngawrediyang kwicaksanan, minakadi kapradnyanan maka larapan gumawe gemuh landubing praja;

TRITYA SARGGAH

SUKERTA TATA PAKRAMAN

Palet 1

Indik Krama

Pawos 4

1. Sane ksinanggeh karma Desa Pakraman Nangka, lwire :
 - ha. Sang sapa sira hugi jejek magenah ring wawengkon Desa Pakraman Nangka, lintang ring tigang sasih utawi 105 dina sane rajeg maagama Hindu;
 - na. Sang sapa sira hugi wed saking Desa Pakraman Nangka, jenek magenah ring dura desa liwaring Desa Pakraman Nangka, nanging kantun mipil ring salah sinunggal banjar pakraman sane wenten sajeroning Desa Pakraman Nangka, sane mula pagenahannya nguni;
2. Papalihan karma desa, kadi hinucap ring sor puniki
 - ha. Krama ngarep, krama desa sane bulangkep, sane sampun mipil ring salah sinunggal banjar pakraman sane wenten sajeroning Desa pakraman Nangka, sane ngenahin karang desa minakadi sne nenten ngenahin karang desa,
 - na. Krama unggu inggih punika teruna tua;
 - ca. Krama nyada, krama desa sane sampun tan keni ayahan lwire :
 - i. Saking pinunas ngeraga tur sampun polih lugraha manut panglokikan prajuru desa, kalih pamutus pararem desa;
 - ii. Mabukti sungkan rahat tur suwe, kantos tibanan, sungkan tan siddha waras, tan siddha maayahan manut pangelokikan prajuru desa;
 - iii. Sampun mayusa 65 warsa manut pangelokikan prajuru desa;
 - ra. Krama balu, krama desa lanang wiyadin istri, sane katinggal seda antuk rabinne, lanang sane kakawonin nyapihan antuk rabinne, wenten balu camput, wenten balu masentana
 - ka. Krama ring dura desa, sang sapa sira ugi wed saking Desa Pakraman Nangka, jenek magenah ring dura desa liwaring Desa Pakraman Nangka, nanging manggeh mipil ring banjarnya nguni ;
 - da. Krama Tamiyu, inggih punika krama sane kinucap ring sor puniki :
 - a. Sang sapa sira hugi saking dura desa liwaring Desa Pakraman Nangka, jenek magenah, madadunung ring pomahaning krama desa, magenah ring pomahaning druwen guru wisesa, hotel, genah mahutsaha miwah salwir ipun sasampun tigang sasih utawi 105 dina, nanging kari manggeh makrma desa ring kmulan desanya, kabuktyang antuk surat

kamulan desanya, kabuktyang antuk surat sasinahan saking keliang desanya;

- c. Sang sapa sira hugi jenek magenah ring wawengkon Desa Pakraman Nangka, yan tan maagama hindu, taler sinanggeh tamiyu, tan sareng sapalikramaning agama hindhu ring Desa Pakraman Nangka.
- te. Tamiyu ngajag, inggih punika, sang sapa sira hugi rawuh ka jroning Desa Pakraman Nangka, nanging tan nekeh magenah irika, sang karawuhin tamiyu patut matur supeksa ring prajuru desa, kalih ring sang amawurat, sajroning harahina ring awengi, yan tan asapunika, prajuru desa wenang nundung tamiyu hinucap mangda matinggal saking Desa punika.

Pawos 5

Ngawit tedun makrama desa, ring Desa Pakraman Nangka :

1. Krama desa ngarep, melarapan antuk tetetapan banjar, lwire : sampun bulangkep, sasampun tigang sasih utawi 105 dina saking dina pawidi widana pwiwahane ;
2. Sang sapa sira hugi wed saking dure desa, magenah ring wawengkon Desa Pakraman Nangka. Sasampun tigang sasih utawi 105 dina katerag antuk prajuru desa sane ngawawa pagenahannya;
3. Krama desa wed saking Desa Pakraman Nangka, matinggal kadura desa, wastu malih mawali ka desa Pakraman Nangka :
 - ha. Yan sangkaning rahayu kalih saking palugrahan prajuru desa patinggale nguni, wenang mawali mipil ring sinalih tunggal banjar pakraman sane wenten sajeroning Desa Pakraman Nangka, nganutin sukertan banjar punika;
 - na. Yan sangkaning tan rahayu patinggale nguni, yogya keliang banjar sane katuju, ngatengahang babawose kadesa, mangda kabawosan antuk prajuru desa, yan katinutin tatepasan prajuru desa punika, tur kacihnayang antuk maguru piduka ring Pura Kahyangan Tiga Desa Pakraman Nangka, prasidha kalugra mipil pinaka krama Desa Pakraman Nangka

Pawos 6

Husan makrama desa ring Desa Pakraman Nangka, melarapan antuk :

1. Seda ;
2. Sangkaning pinunas ngaraga, saha polih palugrahan prajuru desa Pakraman Nangka;
3. Tedah utawi tilar saking agama Hindu.
4. Kasepekang saha kaheladang antuk desa.

Pawos 7

I. Swadharmaning krama desa :

- ha. Krama ngarep, yogya keni payah – ayahan tata turun cumek, nyanggra saraja karyan desa, manut hungguwan sowang – sowang;
- na. Krama Unggu yogya ngarembe saraja karya sane kapuncukin antuk krama ngarep yen wenten pabuat saking desa kahunadikayang antuk prajuru desa;

maayahan patut krama balu punika maayahan, matata turun cumek bulangkep antuk pianak;

- ka. Krama desa ring dura desa, yogya ngaturang penahub ka desa ngamasa masa, sanangken aci piodalan agung ring pura puseh kala Purnama Sasih Kadasa, gung arta manut pangargan beras 15 kilogram, minakadi ngaturang dana pawangunan, ritatkalaning des mapawangun, ngayum wawangunan, sane kadruwe antuk desa gung arta manut pamutus pararem desa;
- da. Kram tamiyu sane maagama hindu, yogya ngaturang panahub ka desa ngamasa masa sanangken aci piodalan Agung ring pura Puseh kala sasih purnamaning kadasa gung arta manut pangargan beras 10 kg, minakadi ngaturang dana pawangunan, ritatkalaning desa mapawangun, ngayum wawangunan, sane kadruwe antuk desa gung arta manut sakasidhan krama suka.
- ta. Krama tamiyu sane tan maagama hindu, tan sareng sapali kramaning desa, nanghing tan wenang piwal ring awig awig, paswaran desa miwah pamutus pararem desa, sane ngindikang tata pawongan kalih palemahan;
- sa. Krama desa samian yogya saturut ring daging awig awig desa pakraman Nangka, paswara miwah pamutus pararem desa ngutsahayang mangda kasiddhan mapikolih sakadi patitis tatujon desane kinucap ring hayun, tumus mamangguhang kajagadhitaning praja.
- wa. Sang sapa sire hugi sane pacang ngadol, ngantahang, maselangan, majegang, masewayang, makedihang palemahan tegal, palasan miwah sane saosan sne magenah sajroning wawidangan desa pakraman Nangka, hugi mangda polih palugrahan saking prajuru desa Nangka yen ten polih palugrahan yogya indike punika kaandegang;
- la. Yan wenten sinalih tunggal sang sapa sira hugi saking dura desa magenah ring wawidangan Desa Nangka, tan makrama desa ring Desa Pakraman Nangka, tan kalugra ngalaksanayang panca yadnya ring wawidangan Desa Nangka, tan kalugra nganggen salwiring druwen desa.

2. Phala peksaning krama desa :

- ha. Krama desa samyan sajaba tamiyu ngajag polih pasayuban wiyadin pangoban saking desa, salwiring wyawaharany utawi wicarany yogya kabawosan antuk prajuru desa, manut tata titining wicara ;
- na. Krama desa samian sane maagama hindu sajaba tamiyu ngajag wenang ngalaksanayang panca yadnya sajroning Desa Pakraman Nangka, manut desa kala patra, sastra agama, miwah nganutin sitan desa hinucap ;
- ca. Krama desa ngarep, wenang polih babagian layuban aci – aci salwiripun tuwas – tuwasan, miwah sawosan sane patut katiba ring krama desa ;
- ra. Nyaluk mapiteges luput ayah – ayah desa lwire ritatkala padewasa mamakuh, ngerebin, nandur pantun, minakadi kundangan, matepetin anak sungkan, mayadnya, polih dadauhan saking sang amawurat minakadi sawosan manut panglokikan prajuru desa ;
- ka. Sane dados nyuksukin ayahan sang tan tedun maayahan yogya saking pangalokikan kalih palugran prajuru desa ;

1. Desa Pakraman Nangka kahemong antuk prajuru desa.

2. Prajuru Desa Pakraman Nangka lwire :

ha. Kelian Desa;

na. Pemaden Kelian Desa;

ca. Penyarikan;

ra. Juru Raksa;

ka. Petangan Desa;

3. Prajuru Desa karemba antuk pingajeng desa.

Pawos 9

1. Sane wenang kaadegang wiyadin kamanggehang dados prajuru Desa Pakraman Nangka lwire :

ha. Krama ngarep, sane jenek magenah, makrama desa, matata turun cumek, maayahan seorah arih ring Desa Nangka;

na. Tan cedangga, sekadi peceng, perot, cungh lan sapanunggalan ipun, sane katandingin kabakta saking wahu hembas;

ca. Wikan mamawos kalih nyurat aksara bali utawi latin;

ra. Mabukti tan nahen melaksana corah.

2. Sane wenang kaadegang dados pingajeng desa lwire :

ha. Kelian – kelian banjar pakraman;

na. Utusan saking pengelingsir dadia;

ca. Kelian – kelian subak, pemangku desa, miwah sang sapisira hugi kabuatang antuk desa kamanggalain antuk prajuru desa.

3. Pidabdab ngadegang prajuru desa

ha. Paruman utawi pasamuhan pingajeng desa ngawentenang seseliran nem (6) diri sane pacang kaadegang dados prajuru desa sasampun wenten sang kaselir punika kapastikayang wiadin kapilih sajeroning paruman desa;

na. Lamine dados prajuru desa wantah limang warsa saking dina pawintenane sajaba kapadgatekalan minakadi sangkaning wenten wicara;

ca. Yan sang sampun nahen madeg pinaka prajuru desa wenang kasudi malih;

da. Yan wenten sinalih tunnggal piwal kalaning kasubdi antuk paruman desa, sang piwal punika wenang katiwakin panglokika, yan tan manut pansaknya, kabaosan antuk paruman desa, yan jati tuhu pansaknya, paruman desa wenang nyudi sane sawosan.

Pawos 10

Swadharmaning Prajuru desa :

1. Midabdabin desa, krama desa, pacang ngupadi kajagadhitan sakala niskala, maka darsana Awig – awig desa, paswaran desa, pamutus pararem desa, nganutin sastra agama Hindu minakadi uger – uger Negara;

2. Ngarancana salwiring utsahan desa kaungkur, ngarancana salwiring sane nyandang pacang wangunang, sane patut hayum, mnut lokika desa kala patra, sane mabuat mangd kasidhan polih palugrahan guru wisesa;

3. Mamawosin salwiring pasamuhan antuk prajuru desa.

4. Mratyaksa, nulingayang sapari polah prajuru desa, lwire : kliyang banjar, pemangku Pusch, Penataran, Dalem minakadi sane sawosan sane wenten sajroning wawangkon desa pakraman Nangka;
5. Midabdabin salwiring pamargin haci – haci ring desa pakraman Nangka, taler nulingayang krama desa indike ngalaksanayang Panca Yadnya;
6. Wenang nyangra salwiring pituduh, minakadi saraja karya saking guru wisesa, werat utawi ringan, sane yoga katiwak ring desa pakraman;
7. Pinaka duta pacang matemuwang babawos ring sang sapa sira hugi, yan pайдikan punika kapineh nyandang pacang marginin;
8. Wenang ngawangunang langlang desa, sane patut ngalanglangin saraja karyan desa, nulinga katreptyan sawawengkon desa pakraman Nangka, salantur ipun indik ngadegang manut paswaran desa;
9. Prajuru desa patut mawinten, majaya jaya ring salah sinunggil pura kahyangan desa, dewasa pawintenan manut pamutus paruman desa ritatkalaning ngadegang prajuru desa hinucap.

Pawos 11

Swadharmaning pingajeng desa :

1. Sareng mikayunin kalih mawosin, sajeroning midabdabin desa, sawerat werat ipun saking pinunas prajuru desa, mangde kasidan mulati kajagadhitaning desa;
2. Ritatkalaning pasamuhan desa pacang ngadegang prajuru desa pasamuhan punika kaamong palaksanaannyane antuk pingajeng desa kantos puput.

Pawos 12

Phalapeksaning prajuru desa :

1. Luput rerampen utawi reramon
2. Polih petuwasan kalih tanding
3. Petuwasan siosan manut perareman

Pawos 13

Prajuru desa kagentosin utawi usan, majalaran antuk :

1. Seda;
2. Mabukti sungkan rahat tur suwe;
3. Mapinunas sangkaning rahayu, sasampun polih lugraha saking paruman desa;
4. Majalaran tutug sengker pangadege
5. Sangkaning kahusanang antuk paruman desa mabukti iwang.

Palet 3

Indik Kul – kul

1. Sajeroning wawengkon desa pakraman Nangka, wenten babacakan kul – kul, kadi ring sor puniki :
 - ha. Kul –kul desa
 - na. Kul – kul Pura
 - ca. Kul – kul Banjar
 - ra. Kul – kul sekehe – sekehe
2. Mungguwing suwaran kul – kul punika mangde mabina binayan sawiji soang, manut sor singgih, yan wenten suwaran kul – kul pateh karun wiyadin sawer mangde kapastika salah sawiji antuk sang madruwe.
3. Nepek kul – kul manut tri bratha sandhi : Dharma, sima, laksana, teges ipun ha.

Dharma : Swaran kul –kul makacihna wiyadin tetengger upacara
Agama wiyadin yadnya

 - na. sima : swaran kul – kul makacihna wiyadin tatengger panca baya
 - ca. Laksana : swaran kul – kul makacihna wiyadin tatengger patedunan
4. Indik tatepekan kul – kul manut pasebaya kuna dresta minakadi paswara.
5. hungguwan nepek kul – kul :
 - ha. yan nepek kul – kul tatengger patedunan hugi kul – kul kadruwe antuk krama, sane pacang tedun katepek antuk sang patut ngulkulang;
 - na. yan nepek kul – kul tatengger panca baya, wenang sahungguwan hungguwan, asing nampek genahe, wenang katepek antuk sang rihinan manggihin baya punika, mikadi sangkaning patuduh sang ngawiwenangang;
 - ca. yan nepek kul – kul upacara agama, dewa yadnya, butha yadnya, manusa yadnya, pitra yadnya, wenang kul –kul sane wenten ring sowang – sowang genah upacarane. Yan nyelang kul – kul sawosan patut wenten palugrahan sang ngawiwenahang.
 - Ra. Yan kalaning ngalungayang batara, mendak batara, batara turun kabeh, tatepekan manut krama. Yan wenten sinalih tunggal mamurug nepek kul – kul tan manut, krama yogya kabawosin antuk prajuru desa katiwang pangalokika saha pamidanda manut paswara.

Palet 4

Indik sangkepan utawi paruman

Pawos 15

Mungguwing sangkepan utawi paruman minakadi pasamuhan ring sajeroning desa pakraman Nangka, kadi ring sor puniki :

1. Sangkepan prajuru kawentenang ngesasih satunggil rahina Buda Manis, yan tan kasidan rahina punika wenang rangkadang apanutan
2. Sangkepan utawi paruman desa kawentenang satunggil Buda Manis.
3. Sangkepan banjar, sekehe, maksan, dadia miwah sekehe – sekehe sawosan sane wenten sajeroning desa pakraman Nangka kawentenang manut awig –awig paswarannyane sowang – sowang nanging hugi tan sinarengan ring sangkepan desa minakadi sangkepan prajuru desa

Pawos 16

1. Sang yogya nedunin sangkepan utawi paruman desa punika pingajeng sang patut sareng sajroning sangkepan desa, maweweh pemangku – pemangku kahyangan desa minakadi krama desa marep sareng sami;
2. Sane patut nedunin sangkepan prajuru desa, pemangku kahyangan desa, minakadi sang sapa sira kabuwatang antuk prajuru desa;
3. Maka manggalaning mababawosan sajroning sangkepan utawi paruman, manggeh panglingsir utawi kelian desa, wyadin situnggal prajuru desa saking palugrahan bendesa.

Pawos 17

Tata kramaning pasangkepan wyadin paruman :

1. Saya patut makta pasayahan, tegep eteh – eteh pasayahan salwiripun, minakadi haturan canang panaracak, manut dresta kuna;
2. Yan kapatut pacang nganggen babanten sakabuwatan, prajuru desa yogya mituduhang mangda cumawis, saka nyukserahang pedagingan ring sang kapituduh makarya babanten ika;
3. Saya wenang nepek tengeran sapisan sadurung ngawitin sangkep, ngeraris aturan punika kaantebang, mabriuk muspa sareng sami, ngeraris mababawosan kantos puput;
4. Babawosan sajroning sangkepan wiyadin pasamuhan hugi ngupadi karahayon jagad, minakadi ngarajegang kamuruban Sang Hyang Widi, majalaran bhawa laksana manut catur dresta lwiripun : desa dresta, loka dresta, kuna dresta, miwah sastra dresta;
5. Yan wenten sinalih tunggal krama ngatengahang babawos, jroning sangkepan, yogya kadamyakang, yan nyandang bawosin yogya rinawosan yan tan nyandang bawosin, hantukang ring sang ngamimitin;
6. Sane kinucap pamutus babawos, wyadin paswara sajroning sangkepan, paruman yan briyuk sepanggul hanut sang nyangkepin, yan tan asapunika, asing wenang turut manut panglokika, pamutus babawos yogya kalekitayang, kalaksanayang manut hanggeranipun;;
7. Prade tan puput babawose sajroning sangkepan kantos ping tiga sangkepan, patut katengahang sajroning pasamuhan, pamutus babawos sajroning pasamuhan pinaka pamutus pamekas;
8. Prade wenten wyawahara utawi wicara mabuwat, sangkepan utawi paruman wawu dados kamargiang risampun katedunan antuk krama desa sekiranya kalih pahtigaan saking krama desa sami;
9. Sangkepan punika kabawos sampun puput, yan sampun nimbang pagilih saya sangkepan, saha sampun mabacak.

Palet 5

Indik Druwen Desa

Pawos 18

- ha. Pura Puseh
 - na. Pura Penataran
 - ca. Pura Dalem Butus
 - ra. Pura Dalem Nangka
 - ka. Pura Pesucian
 - da. Pura Kepuh Sakti
2. Bale Banjar :
 - ha. Balai Banjar Butus
 - na. Balai Banjar Nangka
 3. Tanah ayahan desa, pelaba Pura, Carik
 4. Palemahan sane kaanggen Pura Penataran Agung aturan Mangku Kaler
 5. Palemahan sane kaanggen Pura Dalem Butus aturan I Nyoman Gandul
 6. Palemahan sane kaanggen Pura Dalem Nangka aturan Kaki Sirpa dan Kaki Purna
 7. Setra petang (4) palebahan sane kepah lwire :
 - ha. Setra Nangka kalih (2) palebahan genah mendem apelebahan lan genah morbor apelebahan
 - na. Setra Butus kali (2) palebahan genah mendem apelebahan lan genah morbor apelebahan
 8. Lembaga Perkreditan Desa (LPD), minakadi utsahan desa sawosan.
 9. Lelanguan sekadi tetabuhan lan ilen – ilen padruwen desa lwire : Kul-kul banjar, kul-kul desa, kul-kul pura.
 10. Pralingga Ida Bhatara seregep rawing ilen-ilen, jempana, prabot paayah-ayahan.
 11. Sakancan tihisan toya sane dados kaanggen pasucian Bhatara, sane dados kaanggen beji, sane dados katantan ka desa pakraman, sami kadruwe antuk desa pakraman Nangka.

Pawos 19

Piilih –piilih desa pakraman Nangka :

1. Utpeti tanah pelaba Pura;
2. Piilih pamupon tanah carik, tegal pelaba pura druwen desa;
3. Urunan Panahub, pakenin – kenin, pakaryan krama desa;
4. Aturan, dana punia;
5. Piilih – olih saking Lembaga Perkreditan Desa (LPD);
6. Piilih – olih saking usaha, guna kayan krama desa, minakadi sawosan saking patut rahayu.

Pawos 20

Sang sadaka, pemangku desa, prajuru desa, pinghajeng desa, miwah sng sapa sira hugi sane kapineh nyandang polih laluputan;

lwir laluputan kaungguhang sajeroning paswaran pamutus pararem desa pakraman Nangka.

Palet 7

Dadosan Patedunan

Pawos 21

Dadosan patedunan, sangkepan tedun makaryya miwah sane sawosan, nganutang sukretan sowang – sowang lwire :

Yan prajuru desa madruwe patedunane, yogya nganggen sukretan desa, sane kagaduh antuk prajuru desa, dadosan ngaranjing ka desa;

Yan babanjaran madruwe tatedunane, yogya nganggen sukretan banjar sowang – sowang sane sampun kagaduh antuk banjar punika. Dadosan ngaranjing ka banjar.

Yan subak madruwe patedunane, yogya nganggen huger sukretan subak sane sampun kagaduh antuk subak sowang – sowang dadosane ka subak;

Yan sekehe – sekehe madruwe patedunane, yogya nganggen huger sekeha sowang – sowang, dadosan ngaranjing ka sekeha

Agung alit dadosane sane katerapang ring wewidangan desa pakraman Nangka lwire : ring desa, ring banjar, ring subak – subak, minakadi sekeha – sekeha sawosan mungguh sajeroning paswarannya sowang – sowang, saha maceciren palugrahan prajuru desa pakraman Nangka

Yan wenten krama sinalih tunggal tan tinut ring Tatepasan miwah dadosan punika, wenang babawose katengahang ka desa.

Palet 8

Indik wetwetan, Kakeran miwah Rerampagan Desa

Pawos 22

Desa Nangka wenang ngewet, ngeker, miwah ngerampag taru ritatkala pacang mapawangun, ngayum wewangunan ring pura druwen desa;

Wetwetan desa lwire : taru nangka, cempaka, majegau, sane magenah ring tanah laba pura sane kabuwatang antuk desa;

Kakeran desa lwire taru – taru sane dados anggen lakar wewangunan sane magenah ring tanah pategalan, sajawaning tanah tegal laba pura sane kabuwatang antuk desa;

Munggwing indik ngewet, ngeker miwah ngerampag taru hugi majalaran antuk paswara, pamutus paruman desa Nangka, buate ngemargiang wetwetan, kakeran lan rarampagan kedamyakang ring wadesa;

Indik ngerampag reramon, lwire : ron, busung, hambu, tiying, ritatkala pujawali

- ha. Wenang ngarampag asoroh sajeroning asukat
- na. Ron kalih papah sajeroning asukat
- ca. Busung amuncuk sajeroning asukat
- ra. Hambu amuncuk sajeroning asukat
- ka. Tiyang akatih sajeroning alingseh manut pagilih rerampagan

Yan kalaning ngewet, ngeker miwah ngarampag, sang ngewet, ngeker miwah ngarampag hugi mangda masadok ring sang madruwe wyadin ring panyakap sinalih tunggil, saha sadu hajeng, yan tan masadok danda sang ngarampag gungarta sakadi pangargan sane karampag atikela.

Palet 9

Indik Baya

Pawos 23

- sane kinucap panca bhaya, lwiripun : jiwa bhaya, agni bhaya, toya bhaya, artha bhaya, bhayu bhaya;
- Salwiring bhaya wenang gegerak antuk swaran kulkul;
- Sang sapa sira hugi krama desa sane manggihin, wyadin huning ring panangkaning bhaya, ring kang katiben bhaya, wenang ngegerak nepek kulkul manut indik kakulkulan bhaya, raris damyakang ring wedesa;
- Rikala wenten swaran kulkul bulus tatengger bhaya, krama desa patut yatna, sayaga saha sregep ngamong gagawan sowang – sowang;
- Yan sampun tatas ring bhaya punika, krama desa patut matatulung nambakin, wyadin ngamesehin bhaya punika, manut hungguwan, kalih manut patuduh sang yogya ngawiwangang;
- Sang sapa sira hugi tan kawawa majajabur utawi majarah rikalaning desa, krama desa, katiben bhaya. Yan wenten sinalih tunggal kaciren mamurug, yogya katengahang ka desa, wiyadin katur ring sng amawa bhumi, mangda kabawosan;
- Yan pinganan bhaya punika kapineh sampun nahnah, tan pacang nyengkalen, wenang kacihnayang antuk swaran kulkul lambaty atuludan, wiyadin pasiyar saking sang ngawiwangang.

Palet 10

Indik Penyanggran Banjar Krama Desa

Pawos 24

- 1. Salwiring Karya sane jagi kasanggra antuk desa wyadin banjar kapastikayang sajeroning paswaran desa minakadi paswaran banjar, sekadi papatusan minakadi sakabuwatang desa minakadi banjar;
- 2. Saraja karyan desa kasanggra antuk krama desa kahanudikayang antuk prajuru desa;
- 3. Saraja karyan banjar kasanggra antuk krama banjar kahunikayang antuk klian banjar;

SUKERTA TATA PALEMAHAN

Palet 1

Indik tegal lan karang

Pawos 25

Palemahan desa Pakraman Nangka, mauger antuk tri mandhala lwire :

- ha. Uthama mandhala : palemahan sane kaanggen karang Pura wiyadin parahyangan;
 - na. Madya mandhala : palemahan sane kaanggen karang pahumahan genah wewangunan sakadi : banjar, sekolah, kantor, klinik miwah sane sawosan;
 - ca. Nistha mandhala : palemahan sane kaanggen setra, margi, rurung, telabah, papunduk, tulak tanggul miwah sane sawosan. Sahanan palemahan sane wenten ring wawengkon desa pakraman Nangka, yogya mangde madruwe babaledan wiyadin wates sane pasti;
1. Sahanan palemahan punika hugi mangde madruwe margi, rurung papunduk sane dados entasin.
 2. Yen wenten pakarangan Pura, pahumahan, tegal, miwah palemahan sawosan kabebeng tan madruwe margi, rurung miwah papunduk, sane madruwe patut ngatengahang babawose ka desa, prajuru desa yogya negdeg ngutsayang, mangde polih margi malarapan sami suka. Yan patut matumbas, manut pangargan tanah sane kamanggehang antuk sang amawurat, sami katawur antuk sang mamuwatang.
 3. Yen desa pacang ngalinggahang margi, rurung minakadi makarya margi, rurung desa, saking sampun ingkup paswaran desa kalih sang madruwe tanahe, Yen ngnggen tegal, miwah palemahan sawosan wenang tan nahur pangargan tanah punika. Nanging yan madaging tatanduran, papayon, wawangunan salwire desa patut ngicen prabeya, agung alit manut pamutus perembug desa kala punika, tan dados linggahang ring adapa agung.
- Sahaning karang pahumahan hugi mangde masengker. Pidabdab nyengker, megaleng kadulu. Penyengker sane sisi kangin, miwah sisi kaler patut kakaryanin antuk sang ngenahin karang punika.
- Sahaning tegal, wates ring sisi kelod miwah kawuh kapiyara antuk sang nruwenang tegal punika.
7. Sang sapa sira hugi ngenahin karang tegehan, patut naku, tegehe asukat tanah dangsah, sane tebenan wenang nyusunin tembok.
 8. Telajakan karang patut kapiyara antuk sang ngenahin karang punika sowang - sowang mangda mapikenoh tur asri.
 9. Yen wenten sinalih tunggal nyadya nyalesek wyadin ngeleklek bebaledan salwiring babaledan wyadin wwatesan lwire : Bebaledan wydin bates pura, karang pahumahan, tegal, setra, telabah, jelingjing, margi, rurung, papunduk miwah sane sawosan. Yogya katiwakang dandha manut werat ringan kawiwangane, saha ngantukang ngembah hayu sane kaseleksek wiyadin kaleklek, kalih mrayascitha sakabuwatan sane nyandang katibanan panyangaskara.
 10. Yen hana sinalih tunggal ngaletehin, ngarucakin, ngarobedin, ngararabin, palemahan liwaring pahumahan padruwyan nyane lwire : ngutang luhu, bangkaan miwah salwiring ipun nyorongang babayon, yogya katiwakang dandha gung artha manut pangargan beras 10 kilogram, luhu bangkaan miwah salwir ipun patut katanem olih sang ngentungang, tur mahayu sane kaletahan, karucakan, karobedan, raraban inucap ring ajeng, sahe prayascitha sane nyandang keni panyangaskara.

sajeroning desa Nangka. Yen tekaning kapatiyan dados sahubang utawi pendem ring setra teben utawi setra panghilang – ngilangang, tan polih panyanggran krama banjar minakadi krama desa.

Yen wenten anak tan mahagama hindhhu ngenahin palemahan sajeroning desa pakraman Nangka patut nganutin paswaran desa pakraman Nangka.

Sang sapa sira hugi pacang ngadol, ngantahang, maselangang, majegang, makedihang palemahan sajeroning wawidangan desa Nangka hugi mangda polih palugrahan desa Nangka, yen wenten mabukti mamurug indike punika tan tulus kalaksanayang.

Palet 2

Indik Kakayonan

Pawos 26

Tan kalugra nebtob, ngarebah wit – witan salwir ipun, ring palasan, pategalan, habing, tangkid, miwah genah sawosan sane kakeker antuk desa. Yen wenten sinalih tunggal mamurug, katiwakan danda manut lokika, manut paswara. Tur taru sane karebah mantuk kadesa.

Salwir wit – witan sane sampun kacirenan wiyadin kawet antuk desa pacang mangge mapawangun ring desa, lwire : majegau, cempaka, nangka, predene nike karebah antuk sang madruwe yoga sang madruwe katiwakan dandha manut lokika, manut paswara, taru wyadin wit – witan sane karebah mantuk kadesa wyadin ngetang pangharga.

Yen wenten wit – witan wyadin kakayonan ngungkulin palemahan anak sawos, sane ngawinang tiyeb, tampyas, ngarobedin, asing kahungkulan, wenang ngatengahang ka desa, prajuru desa maritetes saha mituduhang sang madruwe mangda ngerancap, nebtob, wiyadin ngerebah. Yen kantos ping tiga pituduh desane tan kalingu wenang katiwakan dandha anikel tuduh, gung artha manut paswara. Kakayon punika prasida karebah antuk desa picundangan

Tanam tuwuh sajeroning karang pahunahan, tan kalugra tegeh ipun lintangan ring jan palit solas, wyadin 5 m, bungkil ipun adepa agung, wyadin 2,5 m, saking penyengkere ngajerowang. Yan mamurug, wenten raris ngatengahang ka desa, yoga sang madruwe katiwakan dandha gung artha manut paswara, saha ngarebah sajeroning tigang rahina sking pamuput babawose.

Kakayon sajeroning pahunahan hugi mapiyara mangda tan ngaletihin, ngarobedin, mamayen karang sawosan, saking akah kantos daun ipun. Yen wenten mamurug tan tulinga ring kakayonan druwe, wenten ngatengahang ka desa, prajuru desa yoga maritetes saha nepasin manut panglokika kalih paswaran desa.

Yen wenten wit taru mentik kantos ageng ring babaledan, wates, salwiring babaledan mwah wates, wenten ngatengahang ka desa, patut taru punika karebah, raris pinara tiga, apah tigaan mantuk ka desa sang madruwe babaledan apah tigayan sowang – sowang.

Yen wenten sinalih tunggal nundungin tanem tuwuh, kakayonan, sane kaswatah pacang mamayen, wenang kabawosan ring sang madruwe. Yan kas sang madruwe yoga katengahang ka desa. Prajuru desa negteg tanem tuwuh wyadin kakayonan punika. Yan manut panglokikan prajuru desa yoga tundungin, taler akas sang madruwe, patut sepat gantungin. Yan jati kadi penyewatahe, yoga sajeronig tiga rahina, karebah picundangan. Sang madruwe katiwakan dandha gung artha manut paswara, dosane atikel tuduh. Yan tan yukti kadi panyewatahe, sang ngatengahang katiwakan dandha gung artha manut paswara, dosane angadakaken nora, tanam tuwuh wyadin kakayonan punika tan karebah.

8. Yan wenten sinalih tunggal nyadya nandur pijer, turus salwiring tanem tuwuh wyadin kakayonan dados ageng nelesek ring babaledan ring wates.

Yan wenten krama nandur pijer, cengkeh, salak, poh, buluwan, duren, wani miwah sapanunggilan ipun, sane tuwuh ipun panjang ring tegal sasakapan, hugi mangda makarya pasabaya ring sang madruwe tegal hinucap, yan during pinganan mawoh tatanduran punika during nahen ngalopin who ipun sor limang palabuh. During manut pacang rebah raris kajabutan, yogya sng madruwe tegal nawur panjala sawit – sawit, gung artha manut paswara, wyadin pasabaya.

2. Sang sapa risa hugi nyakap tegal, tan kuwasa ngerebah natem tuwuh sane dados anggen lakar wawangunan yan tan polih lugra saking sang madruwe tegal minakadi palugran sang prajuru desa.

1. Krama desa patut ngamanggehang kawerdian tanam tuwuh sane ngawinang desane asri tur lestari

Palet 3

Indik Wawangunan

Pawos 27

1. Sang sapa sira hugi krama desa pakraman Nangka, yan pacang ngawangun panyengker karang pahamahan, patut masupeksa ring karang panyandinge. Yen tan radin yogya nunas degdegan ring prajuru desa, prajuru desa negdeg saduhajeng sang mawicra.
2. Wawengkon ring palemahan pecak tegal, palemahan suwung sane sampun masanggah pawon, palemahan punika prasida kabawos karang pahamahan, dwaning sampun katiwakan pangupakara karang. Awanan patut madruwe rurung betel kamargi agung sukat dados pacang ngalintangang papaga, dwaning tan kapatut ngalintangan sawa ring tegal, yen wenten mamurug, yogya prajuru desa niwakan tatepasan. Mangda sang mamurug mrayascitha palemahan hinucap sane kalintangin.
3. Yan tan masanggah panguluning karang, kabawos akakubon. Tan yogya genah ngaraksa sawa. Yan wenten mamurug yogya katiwakan pamidandha mangda mrayascitha palemahan punika.
4. Yan wenten sinalih tunggal sapa sira hugi pacang ngewangun wewangunan genah ngelaksanayang upacara agama, lwire : Pura, Masjid, gereja, wihara miwah sane sawosan, hugi mangda wenten lekita palugrahan prajuru desa kalih lekita palugrahan guru wisesa. Yan wenten mamurug kadi kinucap ring hajeng kabawos tan sida karyya, tan wenang anggenan, tur wawangunan punika yogya kawangdeyang.
5. Wawangunan sajeroning pahamahan, hugi nganutin tri mandala. uthama mandhala, sanggar panguluning karang. Madya mandahala, pagenahan mapumahan. Nistha mandhala, ngaran lebu, jabayan.
6. Tan wenang ngungkulan capcapan wewangunan sajeroning karang pahamahan sawosan tani druwe. Yan wenten mamurug, wenten ngatengahan ka desa yogya prajuru desa negdeg, saha nyipat gantungin. Yan jati lintang sajeroning selahe rahina saking puput babawose mangda sampun kapastika.
7. Tan wenang nganggen tembok umah wyadin tembok panyengker tani druwe. Wenang ya kasambatsara antuk sang madruwe. Yan akas tur mamurug sang kasambatsara, yogya katengahan ka desa kabawosan antuk prajuru desa.
8. Sapa sira hugi pacang mapawangun nepi ring margi agung, nepi ring rurung desa

9. Sang sapa sira hugi krama desa ngawengku karang pahumahan, yogya hurati myara kaasriyan lebuw pakarangannya. Rurung pentasan pinih sor asukat karangnya ngalajur.
10. Sang sapa sira hugi pacang ngawangun hotel miwah sapanunggalan ipun ring desa Nangka, patut mawaneng pinih sor satus depa saking Pura – pura sane wenten ring sajeroning desa, saha hugi mangda wenten lekita pasubaya kalih palugrahan saking prajuru desa Nangka.

Palet 4

Indik Wawalungan

Pawos 28

Sane kinucap wawalungan, sakancan buron suku pat sane byadya kapiyara, sakadi, bawi, banteng, kambing, jaran, miwah sapanunggalan ipun. Taler watek makampid sane nyadya kapiyara, sakadi, ayam, itik, angsa, miwah sakabacakan ipun.

Sang sapa hugi krama desa myara wawalungan suku pat, sajaba hasu tan wenang ngalumar. Sane patut matelusuk, mangda matelusuk. Sane tan patut matelusuk, mangda mategul bawong. Sane patut maglogor, makandang, hugi mangda maglogor wyadin makandang. Mangda tan ngarucakin, ngaletihin palemahan tani druwe memayen krama desa, jana pada. Yen hasu mangda mabelat. Lwire makalung bawong, maka cihna wenten sane miyara.

Sang sapa sira hugi krama desa, myara watek suku kalih, watek makampid yatnahn hugi, mangda tan banget ngarucakin, ngaletihin pahumahan tatanduran druwen anak sawos.

Tan wenang ngangonang, negulang ingon – ingon maubuh ubuhan ring palemahan tan druwe, minakadi tan sasakapan druwe, yan tan kapisukayang sang madruwe palemahan. Prajuru desa, langlang desa, kliang kliang asing mamanggihin, wenang nyambatsara sang madruwe wawalungan ika. Yan akas sang kasambatsara wawalungan ika wenang taban. Prajuru desa wenang niwakang pamidandha manut lokika, gung artha manut paswara.

Tan wenang ngangonang, negulang ubuh ubuhan ring palemahn karang pura kahyangan salwir ipun, minakadi setra, rurung, papunduk, margi, telajakan, palemahan sane kapingitang, karang suwung miwah sabacakan ipun. Yan wenten mamurug, sang madruwe palemahan, langlang desa klian banjar, prajuru desa sinalih tunggal, asing mamanggihin, wenang nyambatsara, saha naban wawalungan ika, katengahan ka desa, katiwakang dandha gung rtha manut paswara. Saha mahayu yan wenten karusak, tur mrayascitha palemahan ika sane nyandang prayascitha manut panglokika.

Yen wenten mahubuh ubuhan sajeroning karang pahumahan hugi telajan mrayatsayang kandang ipun mangd tan ngawetuwang bhaya, panyungkan. Keke mangda apik, guriten, siksa, mangda tan kantos ngaletihin, ngarobedin, cerobo karang pahumahan wiyadin palemahan panyandinge. Yan wenten mamurug tan siksa ring ingon – ingon miwah kandang ipun, wenang panyandinge nyambatsara, wenang katengahng ka desa. Prajuru desa nepasin wenang katiwakan dandha manut panglokika kalih paswaran desa.

Sang sapa sira hugi krama desa ngawangunan kandang wawalungan, buwat adol atuku, yan kandang ayam, itik miwah sapanunggalan ipun, buwat naluhang, miwah adol atuku, dagingin satus ukud. Yen kandang wawalungan suku pat, dagingin adasa ukud sowang sowang, ika wenang jeroning karang pahumahan lintangan ring punika daging kandang tan wenang wangunan sajeroning karang pahumahan, yogya kewangunan ring palemahan, sane mawaneng sesor ipun satus depa saking karang

Yan wenten wawalungn ngarucakin, ngarug tatanduran, wenang taban : sang madruwe tatanduran ngatengahang kadesa premangkin, kabawosan antuk prajuru desa, saha katiwakan dandha manut lokika paswaran desa.

Yen godel banteng, durung matelusuk, godel jaran utawi babedag kambing miwah sakabacakan ipun, durung antes mategul, tan wenang taban, yan ngajak inan ipun. Yogya selebarang ring sang madruwe, godel kinucap matuwuh sawetara petang sasih).

1. Yan bebek, dolong, angsa, ayam miwah sapanungilan ipun, taler wenang taban. Indike naban, mangda masaksi saha kasupaksayang ka desa pramangkin, prajuru desa yogya mawosain niwakang pamidanda manut panglokika.
1. Yen wenten wawalungan ngeleb, mamegat, ngeranjingin palemahan pura, kahyangan, setra, karang pahamahan, miwah sane sawosan, lokikanan juga, yan tan nyadya kalebang tan yogya taban wenang salabarang ring sang madruwe.
2. Sang sapa sira hugi krama desa Nangka, tan kalugra nyorongan babanyon laleteh kandang wawalungan kapakarangan tan druwe, jelinjing sane wenten sajeroning desa Nangka, yan wenten mamurug, katiwakan dandha antuk desa gung artha manut lokika saha paswaran desa, tur sajeroning pitung rahina saking pamuput babawose, salantur ipun tan kari sorong laleteh miwah babanyon punika.
3. Tan kalugra medil, nulup, nyaring minakadi salwiring pemargi pacang ngejuk paksi ring wawengkon desa pakraman Nangka, yan wenten mamurug katiwakan dandha. Gung artha manut pangargan beras 50 kilo gram kang sadiri.
4. Agung alit dadandan punika kaungguhang sajeroning paswaran desa Nangka nanging lokika juga wisesa.
15. Sakancan dadandan, dadosan sane mungguh ring ajeng sami mantuk kadesa pakraman Nangka.

PANCAMA SARGGAH

SUKRETA TATA AGAMA

Palet 1

Indik Dewa Yadnya

Kaping 1

Indik Kahyangan

Pawos 29

1. Pura Puseh, Pura Penataran, Pura Dalem miwah Prajapati, Pasucian bhatara miwah sane sawosan sane kadruwe antuk desa kahemponin antuk desa, indik pangaci aci manut kuna dresta gagaduhan kalih paswaran desa Nangka.
2. Pura pura Kahyangan sane sawosan ring sane kinucap ring hayun, papayon kalih

Yan wenten karecehan, wicara, sajeroning pangempon pura, kahyangan, subak, minakadi sekehe sekehe sinalih tunggal, wenang katengahang ka desa, prajuru desa mawosin, nyahsahang, nepasin wicarane mangda kasidana mawali landuh jati mula.

Tan wenang nguwah nguwhin wawilangan palinggih Batara, sane wenten ring pura kahyangan sowang sowang, mangda kantun magenah kadi kuna.

Yan wenten pura kahyangan sinalih tunggal reneng pangaci aciannya kantos kasadawarsan, yogya prajuru desa mawosin, maritetes ngutshayang mangda kasidan mawali kadi kajati mula. Nanghing prada yan tan kasidhan, majalaran antuk pamutus paruman desa, prasida desa ngawangunang pangupakara marelina pura punika. Mangda tan karanjingin kahumahin antuk kibutha kubandha.

Kaping 2

Indik Pangaci aci

1. Pawos 30

1. Indik Pangaci aci ring Pura kahyangan sane wenten sajeroning wawengkon desa pakraman Nangka, kaamongin antuk krama desa, manut hemportan wyadin pamaksan sowang sowang sajaba sane kahemponin antuk krama desa sami. Sowang sowang pura madruwe kagaduhan, pinaka huger pangaci aci miwah babanten.
2. Sane yogya muput aci aci ring pura kahyangan sane kadruwe antuk desa pakraman Nangka, Ida sang maangga Sulinggih sane katuhur antuk krama sowang sowang, minakadi pamangku pura ring pura hinucap manut wawenangan pamangku
3. Yan wenten sinalih tunggal pura durung madruwe pamangku, utawi pamangkune kapiyalang, dados nuwur sinalih tunggal pamangku kahyangan desa, prada taler tan marsidayang patut nuwur Ida Sang maangga Sulinggih sane kabriyukin antuk krama desa.
4. Pamangku desa, punika wantah pamangku pura puseh, pura dalem, Pura pura sane kahempon antuk desa sajeroning desa pakraman Nangka, kalugra nganteb banten pangodal minakadi sane sawosan ring pura pura pakraman Nangka sane mamuwatang, taler manut kawenangan pamangku.
5. Ritatkala desa ngawangun kayyira tabuh gentuh, Batara turun kabeh minakadi karya agung sawosan, desa wenang nyarad pemangku pemangku kahyangan sakatahe, pacang ngerombo pamangku desa

Pawos 31

1. Indik pangaci aci pura pamrajan, paibon, dadia punika kahamongin antuk krama desa sajeroning sekehe dadia, pamrajan, manut sima drestanya sowang tan singsal ring ucaping sastra agama hindhu.
2. Pura pura panyungsungan desa sajaba kahyangan desa kahempon antuk pamaksannya sowang sowang

Pawos 32

Beji punika kaaci acinin antuk krama desa. Dina pangodal kalih babanten, manut dresta kuna.

Yan wenten sinlih tunggal beji tan kaaci acinin toya ipun tan yogya anggen sadhana makaryya sarwa suci

Pawaos 33

i – aci, piodalan, usabha, pasegeh ring kahyangan lwire :

Pura puseh rikala rahina purnama sasih kadasa.

Pura Dalem miwah prajapati, kepeah dados kalih genah :

ha. Pura dalem butus rikala buda wage menail

na. Pura dalem nangka rikala buda wage merakih

Ring penataran rikala rahina purnama sasih kapat, ngusaba dodol rikala rahina purnama kasa.

Ritakala jagi odalan ageng, sadurung Ida Batara katuran piodalan Ida kairing masucian kasagara nganutin dresta kuna lan paswaran desa.

Ritakala Bhatara jagi masineb, Bhatara kabeh kairing mahiyang hiyang, ngararis katurin ka Pura Penataran, mendak Bhatara tirta, raris ring penataran ngantukang Bhatara tirta, sasampun puput ngantukang Bhatara tirta, Bhatara kabeh mawali mantuk ka kahyangan sowang sowang.

Pawo 34

Aci – aci kasanggra antuk krama desa, krama pura utawi pamaksan pura sowang – sowang.

Luwiring babanten minakadi heed upacara, manut gagaduhan dresta kuna sowang – sowang pura.

Padagingan pacang aci – aci :

ha. Hupon – hupon palaba pura, tanah druwen desa pakraman Nangka

na. Piturunan utawi wawijilan krama desa.

ca. Pioli olah pagunakayan krama desa.

ra. Haturan – haturan sangkaning krama suka nirmala.

Pasegeh tunggal kajeng kliwon, purnama, tilem, kasanggra antuk pamangku sowang – sowang, padagingan saking druwe pura, pamaksan kahantebang antuk pamangku sowang – sowang.

Sane kalugra muput salwiring aci – aci ring pura panyungsungan desa pakraman Nangka wantah Ida sang maangga Sulinggih sane katuhur antuk desa.

Rikala kabrebean jagate, kagringan, katiben panca bhaya, pinganan tan mresidhayang ngaturang aci kadi patutte, yogya prajuru desa miwah pamangku ngaturang pihuning ring Bhatara, masedhna babanten padhatengan, pacanangan maka cihna tan pegat aci – acine. Ri wus mawali deg – deg jagate patut ngawangun upacara Bhatara turun kabeh, masasirih, makakobok ka sagara giri.

Yan ritakala mamahayu, ngayun papayon, ring pura – pura kahyangan, pinganan tan

Kaping 3

Indik Pamangku

Pawos 35

1. Pidabdab ngadegang pamangku lwire :
 - ha. Ngambil saking saserod Santana wyadin katurunan
 - na. Saking pamuwus sasemburan, wyadin nyanjan, sasampun kantos ping tiga.
 - ca. Sangkaning kajujuh saha kabriyukin antuk krama desa pakraman Nangka.
2. sane tan wenang kaadegang pamangku :
 - ha. Ced angga, lwire : peceng, perot, cungh lan sapanunggilan ipun.
 - na. Mabukti sungkan
 - ca. Mabukti nahen malaksana corah.
3. Sang sapa sira hugi pindaka jan banggul, pamangku ring pura puseh Nangka minakadi ring Pura kahyangan sajeroning desa pakraman Nangka, mangda pageh ngamel kalih ngalaksanayang sasanan pamangku.
4. Sang sapa sira hugi krama desa, sangkaning saserod, sangkaning kasenengan antuk Bhatara polih pamuwus ring sasemburan, minakadi kajujuh kabriyukin antuk krama desa, pacang kahanggen pamangku yan kari alaki rabi yogya lanang istri mawinten.
5. Sang kasudi pacang kaanggen pamangku, patut mawinten ring pura genahe dados pamangku, munggwing prabeya kasandangin antuk pamaksan pura sowang – sowang, yen ring desa antuk krama desane sami.
6. Pamangku patut madruwe hamongan pura sowang sowang, yan tan madruwe hamongan pura, prasiddha tan kalugra ngantebang babanten ring pura – pura salwire.
7. Sinalih tunggal pamangku yan katekan pati, yogya tiniwaken, patut polih patulung saking krama pura sane kahamongin. Yan wus tiniwaken, patut kakaryanang pangelad, wyadin papegatan antuk krama pura hinucap sapuputa. Punika yan pamangkune kari rajeg ngamong swadharmaning pamangku kantos hantaka.
8. Twas-twasan pamangku, mungguh jroning kagaduhan paswaran desa, pura sowang-sowang taler nganutin dresta kuna.
9. Pamangku kagentosin majalaran antuk :
 - ha. Seda.
 - na. Mapinunas mararyyan, saking patut pinunase, nanging tan kari ngalaksanayang dharmaning pamangku.
 - ca. Saking patut pinunase, majalaran antuk lingsir, sampun tan mampuh, sungkan rahat tan kengin waras, kajadayang antuk krama pura, wiyadin desa.
 - ra. Sangkaning kahusanang, majalaran antuk laksana mamurug sesanan pamangku.

Rikalaning maturan amung pamangku ring kahyangan punika sane dados munggah tedun ring palinggih – palinggih pura kahyangan hinucap, minakadi sang sampun polih lugraha saking prajuru desa, yan wenten mamurug, katiwakan dandha mrayascitha palinggih punika.

Pamangku sane ngantebang babanten ring pura, wantah pamangku sane kadruwe antuk pura punika. Yan nenten wenten pamangku ring pura punika, utawi kapiyalang, dados nyarad pamangku sawosan, saking palugrahan prajuru desa.

Tan kalugra masumpah, ma coran, sajeroning pura kahyangan sinalih tunggal, sajaba sangkaning wicaran pura hinucap, taler saking pabuwat krama pamaksan pura, utawi pabuwat krama desa sane ngempon pura punika.

Tan kalugra wak capala, hasta capala, pada capala, miwah sapanunggilan ipun, sajroning pura kahyangan. Yan macihna wenten mamurug, wenten raris ngatengahang ka desa, yoga tiniwaken dandha marisudha kahyangan hinucap.

Tan kalugra malaksana kantos ngawetuwang biyota ring pura kahyangan. Yan wenten mamurug kantos myawadi ring pura, yoga tiniwaken dandha gung artha manut pangargan beras 20 kilogram, kang sadiri, saha marisudha kahyangan punika.

Sang sapa sira hugi kacuntakan, salwiring cuntaka, yan durung mabersih, tan kalugra ngaranjing ka pura kahyanga. Yan katenger wenten mamurug, yoga katiwakin dandha marisudha kahyangan punika.

Sedahan hengengan miwah sapanunggilan ipun tan kalugra masehe ring pura kahyangan sinalih tunggal, sajaba nyanjan pamangku. Yan wenten mamurug, yoga dandha gung artha manut paswara, saha ngawangdeyang masehe.

Tan kalugra ngawentenang kaklecan, jajuden, sajeroning desa pakraman Nangka. Yan wenten mamurug, sang ngalaksanayang katur ring sang amawurat, tur kaklecan jajuden punika kawangdeyang. sajaba tabuh rah tigang sehet.

Tan kalugra makta salwiring sane kasinanggeh tan suci ngaranjing kajroning suter pura kahyangan. Yan wenten mamurug, yoga sang mamurug marisudha pura punika.

Sang sapa sira hugi rikalaning makemit, ring pura kahyangan yan merem, tan kalugra madukan lanang istri, sajaba anak sane kapineh kantun alit durung remaja putra. Yan mamurug keni dandha manut pangargan beras 20 kilogram, kang sadiri tur mrayascitha pura punika.

1. Pamaksan sowang-sowang pura kahyangan sawawengkoning desa pakraman Nangka, kalugra madruwe sukreta nediri-nediri, nanging tan dados singsal ring pasukretan desa pakraman Nangka.

2. Pura kahyangan tan wenang anggen sajaba ngalaksanayang upacara agama hindu. Yan wenten mabukti mamurug, sang malaksana kawangdeyang, tur pakardinyane kapuceh, saha sang ngalugrahin kadandha manut panghargan beras adasa (10) kilogram, maweweh ngawentenang upacara penyangaskara pabresihan.

3. Yan wenten macihna anak wyadin sang sapa sira hugi, katedunan utawi kapanggluh sajeroning pura kahyangan sawawengkoning desa pakraman Nangka, mababawos minangkenang pangandikan Ida Ratu Sasuhunan utawi Bhatara, ring gelis tunasang tirta laluputan mangda gelis hudep. Pirade sasampun kaketisin tirta, kantus ngatemel masera masero, ngawetuwang sumandeya kayun pamaksane, irike patut pintonin, hambalang toya apane, celebhang limannyane makekalih. Yan mabukti tan belus, nyandang gege pangandikan Bhatara. Yan pada belus, tan nyandang gege, gelisan gingsirang genahang mangda doh saking pura punika.

Indik Cuntaka miwah sosot

Pawos 37

Sang sapa sira hugi krama desa, sane kahanan cuntaka, tan wenang ngaranjing ka pura kahyangan, ka panyucian kalaning nyuci gening, minakadi genah salwiring genah sane kinucap suci pingit. Tan wenang ngaryyanin saji salwiring saji sane pacang katur ka sanggar tawang, sakadi suci gening, minakadi banten salwiripun sane jaga katur ka pura, miwah sane jaga katur pitra pindha. Mungging banten sane jagi katur ka praja pathi, dalem panguluning setra, dados karyyanin ring umah sang cuntaka kalaning ngupakara sawa.

Lwir sane kinucap cuntaka :

- ha. Anak istri kalaning ngrajaswala, suwen cuntakane saking ngawit ngrajaswala kantos nyat macihna sampun malukat.
- na. Sang nganten anak istri, suwene cuntaka ngawit saking rahina pangantenane, wiyadin rahina marangkate ngantos puput mabyakawon saha semayut prayascitha malukat matirta.
- ca. Rama rena cuntaka sangkaning madruwe oka. Sane lanang cuntaka suwene saking embas anake alit kantos kepus odel nyane raris malukat. Sane istri pinaka rena cuntaka petang dasa kalih dina saking wahu embas rarene.
- ra. Anak istri karuron pateh cuntakane ring anak ngembasang oka, rabinne cuntaka tigang dina.

Cuntaka melarapan antuk kasedayan, kapatiyan :

- ha. Yen sang ngarepin minakadi sang magenah sajeroning karang pahumahan sang seda, suwene cuntaka pinih suwe solas rahina saking wahu seda kantos puput karyane macihnayang punah cuntakane antuk mererebu.
- na. Sang polih ninjo ngarap sawa ngamel saha ngarembat saeteh eteh upakara pula palining sawa cuntaka adina, punah cuntakane macihna antuk masiram malukat.
- ca. Yan sang manjing mijil ring umah sang kraksa sawa, sasuwen sawa wyadin layone karaksa pateh cuntakane kadi sang ngarepin sawa ika, luwih yan tunggil sidhikara pateh cuntakane kadi sang ngarepin sawa ika.
- ra. Yan manjing mijil ring umah sang ngaraksa sawa wyadin layon sangkaning aninjo punah cuntakane sasampun masiram malukat.
- ka. Yan sang polih nyembah sawa mangan paridan sawa punika taler kabawos cuntaka, punah cuntakane sasampun usan masiram lan malukat.
- da. Sebel karang dados margiyang saking ngawit negtegang daging kantos Ida Bhatara masineb. Wewanengan sebel karang among ring sang magenah sajeroning karang sane kacuntakan, yan wenten seda dados pacang ngamargiyang sebel karang patut pendem makingsan kalaning wengi tan polih panyanggran banjar utawi desa sajaba sang tan patut dados pendem

Anak wetu sangkaning samara dudu utawi tan kawidiwidana pawiwahan, babinjat punika taler cuntaka, suwene cuntaka salamine durung wenten meras wiyadin nuduk ngangkenin piyanak utawi nganggen dadaman.

Cuntaka sangkaning mabhukti madruwe panyungkan sane tan sidha waras salamine kadi hangganing hila, buduh, ngawijilang reged saking silit, bhaga, purus tan henap mameres berung borok tahunan mabanyeh miwah salwiring punika. Suwene cuntaka

Yan wenten sinalih tunggal sang cuntaka antuk ngraksa sawa wiyadin layon, mamanan wiyadin mapakayun ngarawuhin karya ayu atma wedana minakdi mabakthi ring sang wenang kabaktinin dados nanging tan wenang ngarap, ngarembat, nyuhun, ngamel, sahupakaran puspa lingga.

Yan wenten sinalih tunggal krama desa durung tutug cuntaka kadi ucaping harep, mamurug ngalangan yan wenten ngatengahang ka desa, prajuru desa niwakang pamidandha yogya sang mamurug marisudha sakabuwatan manut panglokika.

yan wenten sinalih tunggal anak istri sangkaning tan maha ngrajaswala sasampun ring pura wiyadin ring genah larangane sawosan raris kacirenan wenang ya tiwakin dandha tan maha, yogya marisudha genah punika, katulung antuk pamaksan pura wiyadin pangemonge sowang.

0. Rikalaning krama desa tedun makrya sang kacuntaka tan keni ayahan. Yan mamedek among dados ring nistha mandhalaning pura utawi ring jabayan. Yan mamurug wenang kadandha mrayascitha.
1. Yan wenten sinalih tunggal krama desa cuntaka antuk ngraksa sawa wiyadin layon napkala pagilih pagentosan subak babanjarannya maaci aci ring sinalih tunggal kahyangan desa, pacaruwan ring desa, sadurung tutug sengker cuntakannya wenang tan tedun mayahan, tan dinosan, anghing yan wenten pasadok sang cuntaka ring prajuru desa. Yan wus tutug cuntakane patut nregteg yan kari ngalantur patedunane. Munguwing piturunan, wawijilan daging salwir ipun yogya katahur nregteg sasampun tutug sengker punah cuntakane dados kahetang pangharga.
2. Yan cuntaka gamya gamana prajuru desa ngantosan pamutus sang amawurat. Yan sampun wenten pamutus saking amawa bumi, ring desa katiwakang dandha kadi ring sor punika lwire : mangda mrayascitha raga, genah malaksana, kahyangan desa miwah desa pakraman. Prada yan sang katiwakan dandha mamandel prasidha desa sane mrayascitha desa miwah kahyangan, sang mamandel kabawosang ring desa kaicen pamutus antuk prajuru desa manut pamutus pararem desa.
3. Cuntaka sangkaning mabukti salah timpal, cuntaka ragan sang malaksana miwah desa pagenahannya, tutug cuntakane yan sampun malaksana mrayascitha panyanggaskara raga, genah malaksana, desane mrayascitha desa. Buron sane kaajk matemu samara kapademang bangken ipun katanem.
4. Anak luh beling tan kapariangken, suwene cuntaka kantos sasampun wenten upacara biyakawon saha keni pamidandha manut pangargan beras 50 kilogram.
5. Yan wenten anak mabukti nyolong smara cuntaka patch ring cuntaka gamiya gamana.

Pawos 38

1. Indik sosot

ha. Yan wenten sinalih tunggal pacang nawur sosot wiyadin punagi, salwiring punagi, gumanti sane patut nganggen pamegat sot, tan dados nawur sot yan tan kalaning dina piodalan Bhatara. Ngadasa dinayang aci-aci, sang pacang nawur punagi patut sampun masadok ring kliyang pamaksan pura, yan ring khayangan desa panahurane, masadok ring prajuru desa. Panahuran punagi ika, kapuput antuk Ida sang maangga sulinggih ssampun putus banten pangodale.

na. Yan wenten sinalih tunggal nawur sasangi pacang ngaturang pengodal, hugi mangda ring dina pagantosan piodalane. Sang nawur punagi, wenang nunas kanti patulung karya ring pamaksan. Sang mawur sasangi nyukserahang daging cumek saprabayaning pangodal ring pamaksan pura.

ca. Yan wenten sinalih tunggal nawur sasangi, maturan suwaran tangguran slwiring tatabuhan, sasolahan minakadi salwir ipun, mungguwing prabeya punika sami kahangganin antuk sang masasangi.

sowang, mangda kasiddhan mapwara hayu. Haturan punika kahungguhang sajroning lekita.

Sasarin canang

Sasampun puput pangaci aci pujawaline, sasarin canang punika kapupulang saha kawilangin. Kahunadikayang antuk prajuru desa, pamangku desa, indik ttiwak kalih pamargin ipun, sangkaning jati nirmala.

Palet 2

Indik Resi Yadnya

Pawos 39

1. Krama desa Nangka, yogya ngawreddhiyang kapradnyanan, kahutamayan Sang Hyang Aji, asewaka nunas pawarah ring sang maraga widgdha pradnyan, pinghajeng ring sang kasinanggeh guru loka.
2. Prajuru desa, kliyang banjar, mgutsahayang, kawredhiyan kamuruban kaultaman Sang Hyang Aji, ngawentenang pasamuhan-pasamuhan parembugan, pinaka genah krama desa mamungguhang pawarah warah hayu.
3. Kalaning dewas hayu, wenang desa atirthayatra, wenang desa ngaturang puniya miwah resi bhojana ring Ida Sang maangga Sulinggih. Taler kalaning karya utama ring desa salwir karya sane kaputus antuk Ida Sang maangga sulinggih patut ngatutan puniya. Asapunika taler ring sang mapitulung patut maweh dana.
4. sang spa ris hugi krama desa Nangka yan mapakayun pacang metelah telah, mawinten, mapodgala, taler mangda wenten pasadok mapihuning ring prajuru desa, sajaba patut polih palugrahan saking guru wisesa.
5. Prajuru desa Nangka, mamatut pisan, yan krama desane mapuniya ring sang pradnyan, ring sang widagdha, ring satata ngarajegang dharma, pingajeng ring Ida sang maangga Sulinggih pasuryan nyane sowang-sowang.

Palet 3

Indik Pitra Yadnya

Pawos 40

Pamargin ngupakara sawa, hugi lingging sastra Agama Hindu sane wenten makudang kudang soroh, sakadi hinucap ring sor puniki :

ha. Mapendhem ring prathiwi.

na. Makingsan ring ghni

ca. Atiwa-tiwa, utawi palebon, utawi ngaben.

ra. Yan rare durung makupak huntu wus kepus odel antaka, wenang ngangge pangentas bangbang masadhana klungah klapa gading, ngarab nglungah, tan wenang tiniwaken.

ka. Yan rare durung kepus odel antaka pamali ngaran pendem juga tan hana pangupakarannya kewala ganten utawi adem paican Ida Sulinggih

2. Sang sapa sira hugi krama desa Nangka, tan kawasa makta sawa ka desa pakraman, ...

mamurug wenang dandha marisuddha desa, krama desa sang atatulung dandha artha manut pangargan beras 50 kilogram kang sadiri.

Yan wenten krama desa ngurung sawa, macamana, mabersih, kawenangannya, tan kalugra lintangan ring petangdasa kalih dina, ngawit saking dina sedanne. Yogya mumama tilem, miwah salwir upacara rarahinan. Yan kalaning angurung sawa, sajeroning desa pakraman Nangka kawangunang karya agung ngantos nyuci gening. Lwire matabuh gentuh, Bhatara turun kabeh, karya agung ring Besakih, yogya tumpang salune tedunang saking balene, genahang ring natah umahe saking Bhatara kodal ngantos Ida masineb.

Tan wenang nyekeh sawa yen tan macamana, mabersih lintangan ring roras dina ngawit saking dinane seda. Yan mamurug dandha gung artha manut pengargan beras 50 kilogram saha mrayascitha desa.

Yening ngraksa sawa utawi layon lintangan ring kalih rahina layon punika patut katureksahin mangda nenten maambu kawon.

Sang sapa sira hugi tan wenang nginepang minakadi ngawandeyang bang bang ring setra pakraman nangka, yen wenten mamurug kadandha manut pangargan beras 100 kilogram, bang bang inucap patut kaurug saha maweweh panyangaskara.

Sang sapa sira hugi krama desa pakraman Nangka, tan wenang atitiwa rikala pangaci aci desa lwire : patirta, patotoyan ring Pura kahyangan desa, Bhatara turun kabeh, tabuh gentuh, minakadi karya agung sawosan. Yen wenten mamurug dandha mrayascitha desa minakadi krama desa sane matulung dandha gung artha manut pangargan beras 10 kilogram kang sadiri.

Yen makingsan ring ghni, sawa ginseng, hasti hinanut, manut krama. Yogya nganggen tirtha pabersihan mungguwing dewasa sasor ipun dewasane dados marginin mendem sawa.

l. Yen wenten krama mendem sawa kalaning dina larangan kawasa, nanghing hugi masawen durung masusunin bintang, laku kingsan ngarang.

l. Indik padewasan :

ha. Padewasan mendem ring pratiwi, makingsan ring ghni, wenang katiwakang antuk kliang desa wiyadin pamangku dalem manut pasubaya.

na. Padewasan atiwa tiwa, katiwakang antuk Ida sang maangga sulinggih sane pacang muput, yogya sampun kapatut antuk prajuru desa.

ca. Indik larangan ngupakara sawa, sajaba ngunggahang katumpang salu sane kamanggehang sajeroning desa pakraman Nangka lwire : Buda wage, saniscara kliwon, anggara kliwon, redite umanis, sukra pon, saniscara wage, redite kliwon ika semut sadulur.

Sukra kliwon, saniscara umanis, redite paing, ika kala gotongan, yen ring dora, miwah ring tanggal panglong ping molas, tanggal panglong ping empat belas, miwah tanggal panglong ping siki. Wraspati nuju tanggal panglong ping pelekutus yen ring wraspati, ingkel wong, ingkel wong awuku. Yen wenten sinalih tunggal mamurug wenang dandha gungartha manut pangargan beras 50 kilogram saha mrayascitha desa.

ra. Tan wenang ngahgah ngulung, teges ipun sajeroning setra tunggil, tan dados mresihin sawa, nuju dina pangutangan yen ring setra punika wenten ngalaksanayang pangabenan. Yan wenten mamurug dandha gungartha manut pangargan beras 50 kilogram saha mrayascitha setra.

ka. Tan wenang ngutang ngirim, teges ipun, sajeroning setra tunggil, yan wenten ngirim tan dados sane sawosan mendem sawa minakadi atiwa atiwa, ngaben ring dina punika. Yan wenten mamurug yogya dandha gung artha manut pangargan beras 50 kilogram saha mrayascitha setra.

da. Yan wenten mendem sawa rangkungan ring asiki sajeroning sajeroning setra Nangka sasampun puput mahurubh sane pangawit saha sawosan sawosan.

dalem ring Nangka, patut ngaturang panaub ka desa Nangka ngamasa masa gungartha manut pamutus pararem desa.

3. Yan wenten sawa tan kaparihangken ring wawengkon desa pakraman Nangka, hingaranan bedagan desa, yogya prajuru desa nguduhang krama desa mendem ring setra pinih teben, sasampun polih lugraha saking sang amawurat kaicen bubuh pirata saking desa.
4. Yan sawa sangkaning salah pati, angulah pati, mati kapangawan, minakadi salwir ipun desa tan ngalarangin yan sawa punika tiniwaken, pramangkin. Sara ledang sang madruwe, minakadi Ida sng mangga sulinggih sane pacang muput.
5. Yan wenten sinalih tunggal sawa genahe seda wyadin padem, sajabaning karang pahumahan lwire : ring tegal, Pura, pasar, banjar, sekolah minakadi genah sawosan dudu karang pahumahan, yogya sang madruwe wirange mrayascitha marisudha genah punika. Yan sawa tan kapariangkenan, genah punika patut kaparisudha kaprayascitha antuk sang madruwe hemponan.

Pawos 41

Indik Angatma Wedhana.

1. Sang sapa sira hugi krama desa Nangka, yan kalaning angatma wedana lwire : ngaroras, patileman, Baligya, tan wenang ngawangunang payadnyan, petak, ring palemahan Pura kahyangan desa, nimakadi kahyangan sawosan.
2. Sang sapa sira hugi wus ngawangun karya angatma wedana, yogya karang payadnyan ika kapralina, sakasep ipun petang dasa kalih dina saking dina karyane.

Palet 4

Indik Manusa Yadnya

Pawos 42

1. Sang sapa sira hugi krama desa Nangka, ngawangunang salwiring manusa yadnya, tan wenang magenah ring wawidangan palemahan kahyangan panyiwian desa. Yan wenten sinalih tunggal mamurug, wenang dndha gungartha manut pangargan beras 10 kilogram saha mrayascitha marisudha pura punika.
2. Sane kalugra mawinten magenah ring pura sinalih tunggal, sang sapa sira hugi krama desa pacang kahadegang dados pamangku ring pura kahyangan hinucap. Taler sane kahadegang pinaka prajuru desa wenang mawinten, majaya jaya ring pura puseh Nangka.
3. Indik manusa yadnya sane dados kamargiyang sajeroning desa pakraman nangka hugi sane nganutin drestra kuna minakadi sastra agama.

Palet 5

Indik Butha Yadnya

Sajeraning desa pekraman Nangka, pacaruan manut hungguwan, kalih sor singgih, lwire :

ha. Pacaruan Desa sane kawangunang Sadakala.

na. Pacaruan desa padgatakala, rikala jagate kabrebehan, kegeringan, kadurmanggalan, katiben panca bhaya miwah sane sawosan sane patut carunin.

na. Agung alit caru, manut hungguan acaru, babuatan pacaruan kalih nista, madya utamating caru.

2. Pacaruan ring pura-pura kahyangan, dadya salwire, manut drestan pura sowang, minakadi ewig-ewig gagaduhan pura hinucap.
3. Yan wenten sinalih tunggal kahyangan, salwire, reneng pacarune kantos tigang plabuh, wentang prajuru desa mamawosin. Yan wus puput babawose, yogya maguru piduka, ngawit masasapuh, mangda kasidhan ngaturang pangaci-aci.
4. Pacaron kalaning tilem sasih kesanga, ring desa, banjar minakadi ring karang sowang-sowang, manut sastra dresta, kalanturang antuk brata penyepian.
5. Rikalaning ngalaksanayang catur brata panyepian, krama ngamargiyang ring jro sowang sowang, nganutin tata cara agama. Yan wenten mamurug yogya katiwaken dandha gungartha manut pangargan beras 5 kilogram kang sadiri. Prade wenten kapanca bhaya utawi kabuwatan patut digelis matur supeksa ring prajuru desa utawi langlang desa.

SAT SARGAH

SUKRETA TATA PAWONGAN

Palet 1

Indik Rangkat

Pawos 44

1. Indik rangkat punika, manut desa kala patra, mwanng sima dreta sane kapatutang tur katinutin antuk krama desa sowang-sowang, tan singsal ring uger-uger panagara lwire :
 - ha. Papadikan.
 - na. Marangkat utawi ngarorod.
 - ca. Ngunggahin.
 - ra. Narimen utawi katerimenan.
2. Pidabdab sang merangkat patut :
 - ha. Manut kecaping agama hindu.
 - na. Nganutin yusa sakirangnya rismpun macihna munggah daha truna, nenten singsal ring uger - uger Negara.
 - ca: Prade pacang ngarangkatang sios agama patut ngemargiyang upacara sudi wedhani, sasampun wenten lekita saking Sang amawurat.

4. Yan wenten anak istri krama desa Nangka karangkatang antuk sapa sira hugi, luwih antuk anak saking dura desa, yan kantos arahina ring awengi saking dina matinggale saking jumlah tan wenten pasadok, pajati, yogya sang madruwe wirange nunas kanti ring prajuru desa Nangka mangda ngamargiyang saserepan. Yan sampun sinah genahnya, ngararis ngamargi yang panegdeg.
5. Sang sapa sira hugi krama desa Nangka, yan karawuhan tamyu praya masinutan malarapan antuk ngarorod, hugi mangda masadok mihuningan ring prajuru desa, prajuru desa yogya maritetes, yan sangkaning tan patut pamargin rangkatnya, prajuru desa nguduhang mangda katur ring sang amawurat. Yan wenten krama desa mamurug, yogya sang mamurug dandha gungartha manut pangargan beras 50 kilogram.

Pawos 45

1. Prade wenten anak lanang mobotin anak istri sane sami sami durung madruwe rabi tur sabda kapariangken, prajuru patut ngutsahayang sangkalih majangkepan, tur kaupacarayang sakadi patut olih sang lanang;
2. Prade sinalih tunggal tan tinut karangkatang kadandha gungartha manut pangargan bers 100 kilogram, saha wicaranya katur ring sang amawurat;
3. Yan sinalih tunggal sampun madruwe rabi wicaranya katur ring sang amawurat olih wirangnya, prade mamurug kadandha gungartha manut pangargan beras 100 kilogram.
4. Yan wenten anak istri bobot nenten wenten ngangkenin patut :
 - ha. Sang kadalih mobotin tan pariangken, miwah sang bobot madewe saksi ring pempatan agung, kasaksinin antuk prajuru desa, sasampun madewa saksi patut ngamargiyang pamrascitha ring wewidangan desa pakraman Nangka, munggwing prabeya sami keangganin antuk sang kalih.
 - na. Prade wenten anak sawosan ring sang kadalih mariangken mobotin, wenang sang mariangken punika sareng madewasaksi tur sasampune puput padewa saksine, sang bobot, sang kadalih miwah sang kapariangken sareng mobotin mrayascitha desa, sasampun punika bobotan nake istri kaupacarayang masrana antuk kris.
 - ca. Prade sang patut madewa saksi tan satinut ngamargiyang padewa saksiyan, sang bobot utawi wirangnya patut ngaturang wicara punika ring sang amawurat, saha kadandha manut pangargan beras 200 kilogram.
5. Yan wenten sinalih tunggal krama desa Nangka, ngamet anak istri antuk malegandang, mamendet, marikosa, miwah salwir ipun sane tan nganutin tata krama, tan yogya pinuput widi widana pawiwahannya sadurung wenten pamutus saking guru wisesa.
6. Yan wenten sinalih tunggal saking dura desa, pacang muput rangkat ka wawengkon desa pakraman Nangka, sang madruwe wiring luh yogya nunas prasaksi ring prajuru desa Nangka, maserana antuk canang pangerawos, sinalih tunggal prajuru mangda wenten ngarawuhin.
7. Yan wenten anak istri saking desa Nangka merangkat ka dura desa ritatkala mapuputan nyongkol ka umah wirange istri, patut ngaturang panebas paswaran kul-kul ka desa pakraman Nangka gungartha manut pangargan beras ~~50~~ kilogram, 25 kilogram ngaranjing kas desa, 12,5 kilogram ngaranjing ka panempek, 12,5 katur ring prajuru desa.

Palet 2

Indik Belas Makurenan utawi Nyapiyan

Pawos 46

1. Sane kabawos nyapiyan, punika sang palas marabi, palas makurenan, mawiwit wicara macihna tan tumus suka citaning panunggalan idep sang alaki rabi sane sampun katiwakan pamutus antuk sang guru wisesa saha kadamyakang ring sangkepan desa Nangka.
2. Tata cara palas marabi :
 - ha. Yan wenten krama desa mapikayun pacang palas marabiyan, patut matur supeksa ring prajuru desa, prajuru patut maritetes, tur kaicen tatimbang mangda prasida satata adung marabi
 - na. Sang sapa sira madruwe oka istri sampun marabiyan prade mantuk sangkaning ngambul sajeroning tigang sasih utawi 105 dina, patut matur supeksa ring prajuru desa, olih prajuru desa wicaranya kabawosin tur kaicen tatimbang mangda satata adung malih.
 - ra. Yan tatimbang prajuru desa tan katinutin, wicarannya dados kalanturang ring sang amawurat, prada pamutus sang amawurat pateh kadi tatimbang prajuru desane sang mawicara kadanda manut pangangan beras 25 kilogram.
3. Yan wenten sinalih tunggal krama desa, ngarangkatang sapiyan, sadurung tigang sasih utawi 105 dina, saking dina palase, yogya sang ngarangkatang sapiyan punika keni pamidandha pakerang gungartha manut pangangan beras 100 kilogram.
4. Krama desa sane belas marabi utawi belas makurenan sasampun polih pamutus olih guru wisesa patut masadok mihuningang ring kliang banjar, mangda kadamyakang ring banjar ring desa, sakasep iipun asasih saking palase.
5. Yan wenten anak istri wit saking wawengkon desa pakraman Nangka, nyapiyan ring dura desa, mawali ka desanya, yogya sang madruwe wiring matur supeksa ring prajuru desa, saha mrayascitha marisudha anake luh punika yan tan kaparisudha antuk wirangnya, patut marisudha raga mangda kasinanggeh nirmala.

Palet 3

Indik Balu

Pawos 47

1. Sane kabawos balu, anak istri katinggal seda antuk rabinne, yan anak lanang seda rabinne wiyadin katinggal nyapiyan taler kawastanin balu.
2. Yan wenten lanang balu ngawawengku karang, madruwe sentana utawi oka istri sampun hantes maayahan, yogya maayahan bulangkep.
3. Yan wenten anak istri balu ngawengku karang madruwe sentana utawi oka lanang sampun antes maayahan yogya maayahan bulangkep.
4. Yan wenten sinalih tunggal anak istri balu marangkat, yogya rangkat punika kapuputang antuk wirang lakinne rihin yan babalon punika kari pageh.

- na. Tan dados ngadol, ngadayang utawi makedihang wawarisan ring sang sapa sira hugi sadurung polih palugrahan olih waris kapurusa.
- ca. Prada balu sane pageh nganutin swadharmanya raris katundung olih waris mabine balu inucap patut matur supeksa ring prajuru, prajuru patut mamawosin ngicen tatimbang, yan tatimbang prajuru tan katinutin sinalih tunggal dados ngalanturang wicarannya ring sang amawurat. Prada pamutus sang amawurat patch ring tatimbang prajuru desane sang ngaturang wicara ring sang amawurat keni dandha manut pangangan beras 25 kilogram.

Palet 4

Indik Santana

Pawos 48

1. Sajeroning desa pakraman Nangka, ngarajegang pidabdab Santana kapurusa, sidikara tunggal, paperasan tunggal dadia.
2. Prada pawiwahan tan ngawentenang Santana, ngin ngedih Santana antuk upasaksi sakala niskala sane kawastanin Santana paperasan.
3. Sang sapa sira hugi krama desa Nangka meras Santana, nuduk mantu sangkaning sampun manut ring sukerta dadia/pamaksan sowang sowang kasinanggeh sampun puput palikrama, yogya sangkaning radin, mawidhi widhana paperasan, kasaksinin antuk prajuru desa saha kasiarang ring paruman, tur sampun wenten lekita pamikukuh saking sang amawurat.

Palet 5

Indik Wawarisan

Pawos 49

1. Lwire sane wenang kawarisin :
 - ha. Hamong – amongan ring desa, ayah – ayahan saurah arih.
 - na. Hutang piyutang sang kawarisin
 - ca. Saraja druwe, bhrana, tegal, tatamiyan, sakancan kasugihan.
2. Sane wenang ngawarisin :
 - ha. Manut lalintih paprenahan adoh tampek saking purusa tunggal sadhikara tunggal dadia.
 - na. Putra dadaman wyadin putra paperasan.
 - ca. Mantu dadudukan, minakadi sntana saking nuduk mantu
 - ra. Sangkaning polih pitemes saking sang kawarisin, sang madruwe salwir sane dados kawarisan, saking palugrahan guru wisesa, pinih akeh apahtigayan saking padruweannya maka piolah olih pagunakayan.
3. Sang sapa sira hugi krama desa Nangka, yan tilar saking agama hindu tan yogya ngawaris sane kamulan patut warisin.
4. Ngedum wawarisan kapatut sasampun puput mahabenang sang ngawarisang bhrana kalih kasugihan punika. Sane dados dum, sajaba mangge padagingan pangaci – aci,

na. Sane istri pilih asuhun, hamung muponin tapkala kantung ring umah sowang sowang.

6. Pewaris kengin mapeweweh rikala kantung mahurip ring oka sane pacang kesah marahiyun, marupa pitemes sane dados kawarisang pinih akeh apah tigaan saking padruweyane maka piilih - olih pagunakaya

SAPTAMA SARGGAH WICARA LAN PAMIDANDA

Palet 1

Indik Wicara

Pawos 50

1. Salwiring wicara indik pakraman, ring wawidangan desa Nangka, wenang rinawosan antuk prajuru desa. Yan tan kasiddhan puput, prajuru desa ngaturang ring guru wisesa, lwat matatimbang.
2. Yan wenten indik wicara pakraman ring banjar, pamaksan, subak, minakadi sakehe - sakehe sawosan, yoga kabawosan antuk prajurunya sowang sowang, yan tan kasiddhan puput, wenang katengahang ka desa, prajuru desa yoga mamawosin.
3. Indik nepasin wicara hinucap, tan maren ngupadi dharma kawelas asihan, tur malayanan antuk, lekita, bukti, saksi, saha tan maren mangda nepek ring sadaging awig-awig paswaran lan pamutus pararem desa.
4. Yan pamutus wicara sane katiwakang antuk prajuru desa Nangka tan katinutin utawi tan kahiring antuk sang mawicara, wenang sang mawicara nunasang pangrawos ring sang patat mamawosin, ring guru wisesa.
5. Yan sang mawicara tan tinut ring pamutus wicara sane katiwakang hinucap ring ajang, prasidha sang mawicara tan kalugra ngangge sapadruweyan desa Nangka, dosane mamandel ring desa.

Palet 2

Indik Pamidandha

Pawos 51

1. Lwir pamidandha sane wenang katiwakang antuk prajuru desa, banjar pakraman, subak, sakehe-sakehe, sawawengkon desa pakraman Nangka, sakadi ring sor puniki :
ha. Dandha artha
na. Upasaksi, dewa saksi, pangrarata, sumpah.
ca. Dandha panyangaskara, lwire : mrayascitha, marisudha, miwah salwir ipun
ra. Kasepekang saha kaheladang
ka. Pamidandha sawosan manut palugrahan guru wisesa
2. Patiwak pamidandha, manut hunggwan wicarane swang swang, minakadi werat ringan wicara hinucap. Lwire :
ha. Yan wicara ring desa pakraman, yoga kapidandha antuk desa. Munggwing dadandhan mantuk ka desa.
na. Yan wicara ring banjar pakraman, yoga kapidandha ring banjar ika, dadandhan mantuk ka banjar
ca. Yan ring subak, ring sakehe-sakehe, katiwakan pamidandha ring kuwu tempeknnya sowang, munggwing dadandhan mantuk ka jroning kuwu tempeknnya.
3. Agung alit dadandhan, manut panglokikan agung alit werat ringan kasisinane sane

ASTAMA SARGGAH
NGUWAH NGUWIHIN AWIG-AWIG

Pawos 52

1. Sane wenang uwahin inggih punika, pasukretan, pamutus pararem, wiyadin pamutus pasamuhan miwah sane sawosan sapanunggilan ipun.
2. Sane wenang uwahin inggih punika, pasukretan, paswara, pamutus pararem wiyadin pamutus pasamuhan miwah sane sawosan sapanunggilan ipun.
3. Indik nguwahin kalih nguwuhin pasukretan, paswara, pamutus pararem wiyadin pamutus pasamuhan miwah sane sawosan, manut tata kramaning pasamuhan.
4. Indik nguwahin kalih nguwuhin awig-awig, manut tata kramaning pasamuhan sesampun nunas tafimbang ring guru wisesa kalih polih palugrahan sang amawabumi.

NAWAMA SARGGAH
PAMUPUT

Pawos 53

1. Awig-awig punika mawasta : Awig-awig desa pakraman Nangka.
2. Awig-awig punika pinaka bantang sahananing awig-awig, paswaran, pasukretan, miwah salwir ipun, sane mangge ring banjar pakraman, subak, sekehe-sekehe, sane wenten sajroning desa pakraman Nangka.
3. Banjar, kaityangan, pamaksan, subak, sekehe-sekehe, sane wenten sajroning desa pakraman Nangka wenang ngawangunang awig-awig, pasukretan, paswara, gagaduhan, sowang-sowang, nanging daging ipun tan dados singsal ring awig-awig desa pakraman Nangka.
4. Salwiring sane durung munggah ring awig-awig puniki, kaunggahang sajroning paswara, pamutus, paruman desa pakraman Nangka.
5. Dresta kuna sane kari dados angge, yan tan tungkas ring daging awig-awig desa pakraman Nangka manut Kojaring sastra agama hindhu, hanut ring uger-uger Negara, saha kapupusang sajroning desa pakraman Nangka.
6. Awig-awig desa pakraman Nangka, pawangun krama desa pakraman Nangka
kapastika manut upacara agama hindhu, kala
dina.....sasih..... tanggal..... utawi
punglong....., rah tenggek Isaka
....., magenah ring pura puseh, kapuput antuk Ida Pedandha
....., saking geriya.....
7. Awig-awig puniki kalingga tanganin antuk prajuru desa, lwire : Klian desa, pemaden klian desa, penyarikan, juru raksa, petangan desa saha kasarengin antuk klian banjar pakraman, kasaksinin antuk klian banjar dinas, Prebekel desa Bhuana Giri, Camat Bebandem, kakukuhang antuk Bupati Karangasem.
8. Awig-awig puniki kalaksanayang ngawit dina kantos salantur ipun.
9. Lwir sang ngalingga tanganin :

PRAJURU DESA NANGKA



1. Kelian Desa

(I Ketut Oka)

3. Penerimaan

(I Made Ngurah Alit)

Kelian Banjar Pakraman
Batas

(I Made Jelantik)

2. Pemaden Kelian Desa

(I wayan Suantara, SE.)

4. Juru Raksa

(I Nyoman Puspa)

Kelian Banjar Pakraman
Nangka

(I Wayan Sulendra)

MAKA SAKSI:

Klian Banjar Dinas
Batas

(I Nyoman Suarta)

Perbekel Desa Bhuana Giri

(Ir. Nengah Diarsa)

Kelian Banjar Dinas
Nangka



(I Wayan Sulendra)

Camat Bebandem

(I Komang Agus Sukasena, S.IP)
NIP. 010224390

Kelekitayang ring Kantor Bupati Karangasem :

Duk Rahina Tanggal Masehi

Register Nomor :

BUPATI KARANGASEM

